

## Giubileum pels Amis da l'Ospidal

**Per güdar a l'ospidal s'haja fundà avant 15 ons la «Società Amias ed Amis da l'Ospidal d'Engiadina Bassa». Els s'ingaschan politicamaing e finanziaimaing a favur dals paziants e dal personal.**

Daspö 15 ons s'ingaschan las Amias e'ls Amis da l'Ospidal d'Engiadina Bassa pel provedimaint da sandà illa regiun. L'intent da la società es da mantgnair la sporta da l'ospidal, saja quai pels indigens o pels giasts. Ils commember s'ingaschan politicamaing, finanziaimaing e sun preschaints a divers arrandschamaints. Il giubileum es gnü festagià d'incuort cun üna pitschna festa a chaschun da la radunanza generala.

### Promouwer la fiduzcha

In settember da l'on 2003 es gnüda fundada la Società Amias ed Amis da l'Ospidal d'Engiadina Bassa. L'intent d'eira da promover pro la populaziun la fiduzcha in lur agen ospidal. Plünavant s'haja rendü attent als giasts da l'Engiadina Bassa a la sporta existenta dal provedimaint da sandà. Sper quista promoziun sustegna la società l'ospidal in chosas praticas e cun material. Uschè vegnan realisadas investiziuns o miss a disposiziun mezs finanziaals per progets chi pertoccan ils paziants o ils collavuratuors. Actualmaing sun bundant 250 personas amias ed amis da l'Ospidal d'Engiadina Bassa. Ils blers d'els derivan da l'Engiadina Bassa, ma eir da l'ulteriura Svizra.

### Güda in üna situaziun da crisa

«Iniziants da nossa società d'eiran l'anterieur directer da l'ospidal Hanspeter Sinniger ed Alesch Vital», disch Seraina Bickel, la presidenta da la Società Amias ed Amis da l'Ospidal d'Engiadina Bassa, «Els duos d'eiran eir ils prüms presidents da la società.» L'ospidal as rechattaiva avant 15 ons in üna situaziun da crisa. Culla società nouva esa stat pussibel da s'ingaschar politicamaing e cun quai s'haja pudü salvar l'existenza da l'ospidal regional. «L'ospidal garantischa ün provedimaint da sandà cun üna sporta vasta, chi ha üna grond'importanza per nossa regiun perifera», manzuna la presidenta. Ils respunsabels da la società sun da l'avis ch'üna tala sporta fetscha dabsögn, quai chi simplifichescha eir da far il pass sco paziaint in l'ospidal. «In cas d'urgenza s'esa cuntaint da pudair restar illa regiun ed in vicinanza dals confamiliars.»

### Per collavuratur e paziants

Seraina Bickel es persvasa, cha eir in avegnir fetscha dabsögn dal sustegn da las amias e'ls amis da l'Ospidal d'Engiadina Bassa. «Cullas contribuziuns da noss commembers finanziaina investiziuns chi nu toccan pro'l dovair d'ün ospidal, ma chi van a favur dals paziants», decler'la. Uschè s'haja realisà i'l passà divers progets, sco la cofinanziun da l'ambulanza da giovar i'l üert da sandà o il bogh per naschentschas in l'aua. Plünavant s'ha ingaschada la società politicamaing a favur dal nouv tract d'operaziuns e per la renovaziun da la piazza per l'elicopter. Regularmaing organisescha la suprastanza referats dedichats al tema da la sandà ed exposiziuns d'art illa cafeteria da l'ospidal. «Mincha duos ons sustgnaina cun 500 francs üna gruppa d'impiegats per ch'els possan far alch da cumpagnia, quai chi promouva eir la solidarità tanter la squadra», manzuna Seraina Bickel. Actualmaing vain imbelli, cun l'agüd da la società, l'üert e lö da trategnimaint davant la Clinica curativa cun plantas indigenas. «Prosmamaing realisaina amo il uschè nomnà labirint cretais chi simbolisescha il gir da la vita », uschè la presidenta.

A chaschun da las festivitats dad ün desch ons medicina complementara e 111 ons ospidal als 8 da gün sarà eir la Società Amias ed Amis da l'Ospidal d'Engiadina Bassa preschainta cun ün stand. (anr/afi)



**L'ambulanza da giovar es gnüda finanziada dals commembers da las Amias e'ls Amis da l'Ospidal d'Engiadina Bassa. fotografia: Annatina Filli**